



## Roho Ndani ya Kristo

### Tangu Ujanani

**N**a alipopata umri wake miaka kumi na miwili, walipanda kama ilivyokuwa desturi ya sikukuu. —**Luka 2:42.**

Katika umri wa miaka 12, Roho Mtakatifu alikuwa akikaa juu ya Yesu, na alianza kuhisi uzito wa ujumbe aliokuja nao duniani. Nafsi Yake ilichochewa kuchukua hatua. Kama mwanafunzi, aliuliza maswali yasiyo ya kawaida, ambayo yaliangaza nuru katika akili za wasikilizaji Wake, na kuwaleta kwenye ufahamu wa unabii na utume wa kweli na kazi ya Masihi waliyokuwa wakitarajia.

Watu wa Kiyahudi walikuwa wakishikilia mawazo potofu. Walitarajia mambo makuu na ya ajabu, wakitumaini kuinuliwa kwa nafsi zao juu ya mataifa mengine duniani wakati wa kuja kwa Masihi. Walikuwa wakitazamia utukufu utakaokuwa katika kuja kwa Kristo mara ya pili, hivyo hawakutilia maanani unyenyekevu uliotakiwa kuambatana na kuja Kwake kwa mara ya kwanza.

Lakini Yesu, katika maswali Yake kuhusu unabii wa Isaya ulioashiria kuja kwake kwa mara ya kwanza, aliangaza nuru katika akili za wale waliokuwa tayari kupokea ukweli. Yeye mwenyewe alikuwa ameutoa unabii huu kabla ya kuingia katika hali ya kibinadamu, na Roho Mtakatifu alipomkumbusha mambo haya, na kumwonesha kazi kubwa aliyotakiwa kuitekeleza, aliwapatia nuru na maarifa wale waliomzunguka.

Ingawa aliongezeka katika maarifa, na neema ya Mungu ilikuwa juu Yake, hakujivuna au kuhisi kwamba alikuwa juu ya kiwango cha kufanya kazi za kawaida. Alishiriki kwa sehemu Yake, pamoja na baba Yake, mama Yake, na ndugu Zake.... Ingawa hekima Yake iliwashangaza madaktari wa falsafa, bado alijinyenyekeza kwa walezi Wake wa kibinadamu, akichukua sehemu Yake ya mizigo ya familia, na kufanya kazi kwa mikono Yake mwenyewe kama mfanyakazi mwingine yeyote. Imetamkwa kuwa Yesu (alipokuwa akiongezeka umri) “alizidi kuendelea katika hekima na kimo, akimpendeza Mungu na wanadamu.”

Ujuzi aliokuwa akiupata kila siku kuhusu utume Wake wa ajabu haukumzuia kufanya kazi za kawaida kabisa. Alishika kwa furaha kazi ambazo kwa kawaida huwakabili vijana wanaoishi katika familia maskini. Alielewa majaribu ya watoto; kwa maana alibeba huzuni na majaribu yao. Nia yake ya kufanya yaliyo sahihi ilikuwa thabiti na imara. Ingawa alishawishiwa kufanya maovu, alikataa kuondoka hata kidogo kutoka katika ukweli na uadilifu wa hali ya juu. Alidumisha utii wenye upendo mkamilifu kwa wazazi Wake; lakini maisha Yake yasiyo na doa yaliamsha wivu na kijicho kwa ndugu Zake. Utoto Wake na ujana Wake haukuwa mwepesi wala wa furaha. Ndugu Zake hawakumwamini, na walichukizwa kwa sababu hakufanya mambo yote kama wao, wala hakuwa mmoja wao katika matendo maovu. Katika maisha Yake ya nyumbani, alikuwa mchangamfu, lakini kamwe bila makeke. Alidumisha mtazamo wa kujifunza kila wakati. Alifurahia sana maumbile, na Mungu alikuwa mwalimu Wake (The Signs of the Times, Julai 30, 1896).